

# *En la nef de bonne nouvelle*

*Espoir a chargié Reconfort*

*Pour l'amener, de par la belle,*

*Vers mon cueur qui l'ayme si fort.*

*A joye puist venir au port*

*De desir et, pour tost passer*

*La mer de Fortune, trouver*

*Un plaisant vent venant de France*

*Ou est a present ma maistresse*

*Qui est ma douce souvenance*

*Et le tresor de ma liesse.*

*Certes, moult suy tenu a elle,*

*Car j'ay sceu par loyal rapport*

*Que contre Dangier, le rebelle,*

*Qui maintesfois me nuist a tort,*



*Elle veult faire son effort*

*De tout son povair de m'aidier.*

*Et pource lui plaist m'envoyer*

*Ceste nef plaine de plaisance*

*Pour estoffer la forteresse*

*Ou mon coeur garde l'esperanoe*

*Et le tresor de ma liesse.*

*Pource ma volenté est telle*

*Et sera jusques a la mort*

*De tousjours tenir la querelle*

*De Loyauté ou mon ressort*


*J'ay mis ; mon coeur en est d'accort.*

*Si vueil en ce point demourer*

*Et souvent Amour mercier,*

*Qui me fist avoir l'acointance*

*D'une si loyalle princesse,*



*En qui puis mettre ma fiance*

*Et le tresor de ma liesse.*

## *ENVOI*

*Dieu vueille celle nef garder*

*Des robeurs escumeurs de mer,*

*Qui ont a Dangier aliance ;*

*Car, s'ilz povoient, par rudesse*

*M'osteroient ma desirance*

*Et le tresor de ma liesse.*

*Charles d'Orléans (1394-1465)*

